

王報春字育萬高城人舉順治乙酉鄉試教諭徐溝遷永年令有循聲告歸後祀名宦祠其宦蹟詳載永年誌中

郭嶷然字因之一字青岑泊村人舉順治乙酉鄉試教諭交城遷知閩清縣會鄉試同考府推官屬其私人以千金執不可推官怒伺其過不得乃調補清江瀕海多盜逼城下守禦有方親登堦諭以信義卽時引退民與鄰邑持刃爭界諭以蒲朝禍敗其事遂息以憂歸再補昭化有女子爲盜主交通半天下前令皆先往致敬乃得相安至是吏以故事白嶷然執不肯亡何女子來謁偉岸桀黠不可御嶷然怒猝捕下獄募民有訟者旣盈案卽斃之獄而臺司大吏各爲關說已無及其黨震散卒亦無他其餘殘民寥寥御之如家人教以耕織爲製其器地產金有

朝邑志卷五

類狗頭者民得之爭以獻卻曰嗜此者真狗頭也解官後囊無一物云

劉壘字爾符別號三峯故現人順治丁亥進士除知烏程縣縣故繁劇號難治剔釐奸弊警服豪強漕糧立倒厥法他縣多倣之擒治大湖巨盜親搏戰水上獲渠魁白花蛇沈三卽斃之獄不令得關通上官復爲縱釋殺黨羽二百餘人羣盜震懼不敢止五百里內廉幹名傾兩浙長興歸安同時缺令民爭求壘署其縣事闕於府治前歸安民奪肩輿去乃定以憂去久之用錢糧磨勘復至縣縣民競供薪米八年竟謫四川按察司照磨署通江簡州皆有惠政在湖時監司有修卻者適被論或以其罪歎呈卽焚之曰無爲許事也著有鏹山集若干卷壘文學幹操志不在小而偃蹇仕途其詩尤多感慨陶鎔涵濡自達所詣古

文辭置之歐曾集中巧眼不能辨也

王鏐字翼冶號紫沙于陞從子順治丙戌舉人蚤有孝名爲陽信令以幹操著有兄妹訟園產者妹執父遺囑而兄務賄賂累官不決鏐至以理直之產歸於妹公論大快解官後貧不自給詩名紫沙集亦有家法

張表字石納倉西人爲諸生就兄策廬州同知署時熊雪堂令合肥奇其文爲梓傳之崇禎丙子舉於鄉入國朝順治己丑成進士館選歷編修以父老乞歸省不已謫判鄭州再補邛州歸卒

張好奇字知天綸音子順治壬辰進士知鞏縣歷陞刑部主事員外戶部郎中康熙壬子典福建鄉試遷河南提學僉事初鞏黃灘水口地因民暫耕遂起稅額然時輒沒入河稅不得脫好

奇請每三年一丈以地有無爲存豁鞏人德之尤慎刑獄以爲動關人命死生立簿自計功過元日告天焚之在刑部時完縣人蘇四投旗下而舉家皆見役四父告其事力爭數四堂不能奪竟免其家蘇四亦聽贖歸其餘全活甚多鄉居不爲岸異好施與蓋長者也

王錮字萬生順治戊戌進士除武昌府推官妖民范東陽結白蓮社煽惑民人諭以朝廷威福身家利害即時泣拜解散事載武昌祠碑御史顧豹文獎薦以爲長才潔守非虛美也竟以清節拂衣歸與從父兄鉞杜門倡疇而已

張柟字讓伯表族子順治乙未進士除知巴縣陞戶部主事年四十三卒於家爲人質直剛果少不羈通籍後執贄王復齋先空門下毅然要做天下第一流人事爲巴縣力變舊政行取赴

京清貧不自給著有質言二卷皆言政事設施及聖賢修身省心之要非雕繡爲工者也

張召南字仲文新莊人順治辛丑進士知安福縣縣西鄉連山阻遠民刁抗不供賦役召南單騎往諭以大義咸感泣輸賦爲各郡最康熙甲寅耿逆叛安福積爲賊徑僞將兵萬餘將臨召南赴省求兵未至而城陷復赴總督請兵恢復因欲以滿兵駐安福檄催糧料甚急力陳其不可乃止是年秋召南在省賊復陷城明年春吉安亦陷賊以七百人據縣召南請兵恢復主兵者不暇及召南知賊可破馳至境內招集鄉勇令健僕率以攻賊遙爲聲援於外賊乃逾山而遁遂復安福入城招撫僞官五十七員難民萬餘人令耆老勸諭開墾給牛種墾田凡二千頃陞中書舍人未任卒初鄉民感召南招諭恩亂時結砦自保迎其家屬供給之故城屢陷而不罹其難

朝邑志卷五

三

王在直字信之皞如季子少孤事母孝內外無閒言長而好義閭鼎李天井等負欠者數十家悉其券焚之訓導河州新生翟揆輩饋修儀憐其貧不受歸家課子孫壽八十七終

劉峒字星柱號筠石璽長子幼有不慧名稍長嗜學幾忘寢食肆力古文學康熙戊午舉於鄉數上春官不第辛未壬申閒歲頻饑累日不火食猶讀書不輟至困仆啖藜糠覈餅得不死時當事諱災峒力請報聞簡牘頻煩切至及朝命大臣勘賑又呈朝災狀乃得與他邑同賑已除鄜州學正移教授榆林衛補寧夏以疾不就著有大小正義等書數十卷弟嶠已卯舉人亦有名

王鵬程字搏九報春子少穎敏十四歲補弟子員精制義試輒

第一從問業者多以成名康熙己卯舉鄉試第一質朴不爲虛異鄉隣信愛之不及仕而卒著有華河集

王建常字仲復之案從子少爲諸生後棄去銳意聖學閉戶讀書不交世人人家貧嘗不舉火而泰然自得至老披閱無虛日著述甚多務發明程朱以斥陸王之失其所著皆手書細字端楷一筆不苟性方嚴造次以禮華陰王宏撰稱爲泰山巖巖晚年造詣純粹有光風霽月之度戶曹張柟通籍後始拜其門自言不遇先生幾枉一生吳縣顧炎武博雅冠天下至關中數以疑義相質學使許公孫荃造廬候請題名真隱其初至持金幣爲壽旣晤語移時逡巡不敢出明日改命使者餽葛棉數種猶不受使者陳主命以死請不得已受之許前賦詩相問受而不酬後復以詩來請和終不屈意其執持多此類也年八十五自爲

誌曰滑野王仲子名建常字仲復復齋其別號也少治舉子業及壯丁國變掛冠杜門讀濂洛關閩書發憤爲聖賢之學然氣昏質弱雖矻矻五十六年而迄無所成臨終書此以誌其墓系以銘曰存心養性徒有志於往聖守分安貧幸不辱乎吾身關中後字遜伯號獨鶴望仙觀人慕馮恭定之學自任力行修舉孝經小學事二親以孝聞少時其祖怒家人請饌不從中俊痛哭三日祖怒解乃止居親喪以禮不爲浮屠事入國朝去諸生隱居所著有巢居野人集鶴陰鳴和集將終子誠明請遺言曰我之學本於孝汝之孝學於我汝能孝是我爲有子矣尚何言哉口占斷句云衣冠還太古身體亦歸全七十八年內一心常泰然弟中偉亦棄諸生不試

王康字公黼號悔齋泰安堡人少穎慧父商於南物水濱徒跣

千里求屍不得號泣歸途抱恨終天絕意仕進會以諸生長揖
貴者見忤因自裂其冠衿曰吾縱入官終當折腰白衣自適若
古人者何嫌乎遂隱居不出性嗜山水工繪畫頗得右丞家法
雷栢林李河濱皆重之家貧每乘輿潑墨自給如唐子畏所云
不使人閒作孽錢者詩亦多警句與人觴詠終日未嘗一語及
城市事風節不愧通隱

張五經字翊書歲貢生望仙觀人經明行修淡於仕進年四十
謝舉子業閉戶窮經著有太易彙解口不絕吟手不停披士林
宗之膺鄉飲五次孫發祖辛丑進士官禮部主事亦有名

郭治字完我康熙辛卯舉人任雲南寶寧縣知縣居官多惠政
善察人私隱民多不敢爲奸性豪邁遇事敢爲京城舊有朝邑
會館爲要人所佔人咸憚之不能爭治獨力身任申之法司俾

得仍歸趙璧至今邑紳赴禮闈暨候補謁選者羣頌其德不衰
麻居湄字交叔柳村人雍正癸卯進士試用偃師縣知縣寔授
陽武署鄭州兼攝上北河同知歷所任勤勞河工寬催科慎刑
獄捐修文廟城池設義學捐賑飢民數千人又捐給牛種凡墾
報數百頃以病歸居家孝友壬子歲歉出金散給鄉鄰親族貧
乏者 錄府志

張麟字景山號覺菴歲貢生望仙觀人峭直磊落喜排難解紛
恥爲柔佞之行研究四子書至老不倦教二子發祖懷祖俱成
名入仕籍性嚴峻家法整肅家人未敢有犯者好濟困扶危鄉
人受其庇者至今戴德不衰

張發祖字孝舒號西濱望仙觀人康熙辛丑進士官禮部主事
性恬退自少嗜學勵志聖賢言動必循禮法無所苟且爲人一

主於敬平生無所著述惟以身體力行爲主常曰得尺行尺得寸行寸乃爲實學儀容斂抑退然若不勝衣而剛毅有守有確乎不拔之節居官九載清操卓立艱苦之狀寒士有所不堪而處之恬然林下三十年閉門課讀不爲衣食計家屢困館穀常以給親舊之貧者身雖浣衣濯冠晏如也其內重外輕類如此蘇石麟字瑞生號景坡泰安堡人丁未進士福建詔安縣知縣在任十六年告養歸以疾卒居官廉潔不名一錢勸農課士循循如家人父子閩人有良牧來何暮清風海內傳之句

上官汝恢字端伯號果齋歲貢生有孝行以義服人里無爭訟常推田畝以宓貧不能葬者善教誨成人材丁巳進士趙蒲受業其門其子德輿雍正壬子冠於鄉雍正五年保舉賢良方正辭不就邑令楊臚賜顏其門曰理學名儒

趙蒲字廷璧號毅齋丁巳進士四川儀隴縣令到任時值金川用兵籌運芻糧夫馬事不累民刻日畢舉凱旋後乃重修文廟日與士子講學文教振興爲治一以薛文清公從政名言爲法宰儀十五年循聲大著監司方擬卓薦而告歸意決束裝瀕發士民攀轅追餞者夾道抵家首建宗祠修族譜節俸所餘以周貧乏助族人之無力喪嫁者常云財不可私諸已古人有積金與子孫子孫未必能守之語信哉常刻王浚齋小學句讀大學直解太極圖解諸書其教子孫必述祖宗忠厚積德及勸業之艱對生徒雖盛暑衣冠必肅並所刻浚齋諸書示之曰此作聖之基也以故從學者成名甚多年七十六而卒一子學厚亦以文學世其家

安養哲字旣明號保亭西王里安家莊人性孝友英敏嗜古文

學雍正癸卯舉於鄉任廣西隆安縣令隆邑襟江負山地素瘠薄苗疆舊地俗甚狡險哲至任革陋規懲奸剔弊禮士勸農隆民德之五月早稻入籽亢陽不雨相其地勢平坡者開渠引江水灌溉稻田數百頃至今隆民稱利焉上憲嘉其能屢試盤錯隣邑宣化縣豪衿王嵩霸民山田六十畝有奇積案數十年哲奉憲委一訊得實復親臨勘驗王嵩懼罪以重賄求免哲正色拒之終以實情定案果化州土知州趙應龍將州地典於宣化縣里民復換契霸種宣民上控果化州趙先以人參金器等物饋送哲不受後藩憲以果化州伯佔民田事發審始知前所饋正爲此也讞成上憲喜曰人言安令明允信然隆有官田數區租入向爲邑令養廉哲盡給學官爲生徒膏火粵西學使羅公以道義文章爲忘形交謂學問操守雙清邵陽秦映林渭南王栗公交口稱其學問純粹書翰有晉人風後調任懷遠縣以丁外艱歸

劉昱字汝正號覺菴故現村人烏程縣知縣璽之曾孫己酉經魁登丁巳明通榜選授府谷縣教諭遷平涼府教授十年請告歸初任府谷訓課有方文風丕變科第蟬聯紳士感戴至今猶有不遠數千里而來訊者在平涼每奉委查賑無濫無遺小民均沾實惠平生博極羣書究心經濟自經史子集以及易象卜筮無所不通尤精岐黃家言爲文章喜醇正所作古文辭多不存稿頗以詩酒自娛在籍十餘載卒未嘗一入城市跡其爲人蓋廉靜端方不愧清白家風云邑人雷聲遠撰

張毓璜字曠年號炎南雍正己酉拔貢任山東觀城縣令勤民事雖洹寒酷暑不以勞瘁稍弛遇有關民生大計者必力爲陳

請興利除弊邑故僻小而貧其爲人恂幅無華不事梯策故不克展其所長後竟以疾卒於官

趙淵字子靜號龍溪西平羅村人乾隆丙辰舉於鄉任江西瀘溪縣令甫下車適逢歲歉因偏災格於例不得上請出已資二千金稍紓民困每屆春耕則携羊酒出郊以勞瀘人繪勸農圖焉旣調南城瀘人挽留不得遮道焚香者不絕其治南也緩催科絕苞苴慈惠清廉口碑載道卒於官白衣冠而送者數千人上官德輿字敬甫號虛齋上官村人雍正壬子解元乾隆壬戌進士居家孝友父母棄世兄弟之間怡怡如也歷任浙江建德永嘉縣令居官六載廉介自持乾隆九年建德山水暴發舟行市中沒民田數千頃捐捧煮粥賑濟全活甚多永嘉風俗刁弊販賣子女市糶水米貿易潮銀悉力行禁止又創建育嬰堂置

田千餘畝撫養無主之嬰兒數百人

張愉字子言歲貢生任同官縣訓導品高行卓學問淹雅與羣季子弟輩友愛殷勤率導不遺餘力且嘉惠後學惟恐弗及同庠生薛建周臨沒泣以幼子封相托慨然允諾恩勤教訓不啻已子封遂早擅文名愉平日自奉儉朴心存惠愛捐粟賑荒輸金助役不一而足邑令先後至者皆稔知高誼一再舉鄉飲大賓

上官希憲字仲章上官村人乾隆癸酉舉人任江西餘干縣令潔已奉公愛民如子民居常遭回祿叩頭默禱烈焰頓熄古良吏返風滅火不是過矣在任未久竟以疾卒人咸惜之

胡國定字君正永防莊人附貢生任直隸山海關通判陞滄州知州州號繁劇非才具優敏者鮮克勝任國定精明廉幹案無

畱贖無不稱神爲人尤仗義疎財足式慳吝子麟亦行誼
王廷輔字公左號雲溪歲貢生任甘肅古浪縣訓導咸寧莊太
史承籤爲之傳曰余適古浪見其都人士相與語曰安得學師
如朝邑王夫子哉諮其所以僉曰王夫子始涖學宮召諸生立
齋下諭之曰學者德行爲本文藝爲末倘名節有虧卽學富才
充亦不見其不朽未幾稟生嚴進朝受土司官杖責附生張問
士蒙捕廳拘訊王夫子奮然曰土司捕廳辱生員置教官於何
地隨攜篆稟府尹而二官遭大譴呵仍嚴飭通學謂士不自愛
以致辱身敗名朝與士其前鑒也自是古浪人士知恥自好者
多矣貢生楊承諭將以軍需事控縣尹于制臺夫子卽面數非
罪曰撓阻軍令豈學校中所出楊弗聽卒控之及罹於法然後
悔自是古浪人士奉公守法者多矣古浪地僻山深讀書人鮮

少夫子謀於縣尹汪君濤捐俸募金詳請創立書院又以其膏
火束修入正項交代俾勿壞自是古浪人士敦師講學者多矣
王夫子視學五年其振刷培植類如此居家事繼母張孺人至
孝待異母弟甚厚性廉靜一介不苟廣訓生徒著四書集註釋
疑精書法並善畫山水是文與行固兼而有之余至其鄉聞其
鄉評曰不質不文不驕不諂行其庭見陝撫陳諱宏謀手書匾
額曰言坊行表嗚呼王公爲人之始末於此見矣王公諱廷輔
字公左雲溪其別號

徐朝錦字萬龍兩女鎮人歲貢生官甘肅靖遠縣訓導訓士嚴
立規條仿胡安定經義治事之法口與士子講貫嘗葬母族趙
氏之無後者七世十一塚人稱其義其生平陶情詩酒不以得
失繫懷雖日不舉火處之泰然不求名人亦無名之者

張懷祖字孝蘊號毅軒望仙觀人乾隆甲子舉人以明通授甘肅河州學正身先率士訓勉有方膺保薦任山西孟縣令撫民如子不事鞭笞狷介有守請托不行三年以病歸閉戶著書不問外事

雷爾杰字漢三號毅齋乾隆庚辰鄉榜第一分發雲南知縣借補騰越州別駕歷署大姚縣霑益州在任如寒時視民如家事勸農課士息盜安民燭奸若炬嫉惡如仇有神明之稱終以亢直不合罷

徐渤字學海號又拙康熙甲午舉人山東栖霞縣知縣栖霞先有邪教株連逮繫累累渤蒞任憫焉爲別其首從定罪力請於上官得未減者甚衆至開徵令民自封投櫃杜侵漁革耗羨絲毫無所染民爲建清廉碑以頌德

王人瑄字璧六西高城村人康熙辛卯副貢任高臺縣教諭方嚴有守其啓迪多士必以器識爲先而才藝爲後經其造就者皆成名儒

徐璉宏治進士由戶部郎中出守江西袁州宸濠變起璉起兵會王守仁於樟樹鎮同臨江戴德孺贛州邢珣等各將精兵破宸濠於黃家渡獲首功遷江西右叅政錄功增秩二等前縣志遺漏未載府志入勇略卷今補入

段嚴字績學有文行以名諸生入成均例授城固縣訓導嚴課士子制藝之外兼及詩賦策論評其優劣而繩削之故遊其門輒蔚然有文采可觀來謁者概不索其贄其尤貧不能從師則招而置之橫舍朝夕與其討論俾有所成就去官日士人爲之立坊以誌感焉

上官有儀字公度雍正丁未進士才識明敏有守有爲任山東齊河縣知縣理滯獄端士風嚴行保甲奸宄無所容御民一以誠信三年縣大治擢授戶部主事綜覈詳慎有能聲

雷應字效生號洪齋康熙丙戌進士博羣書熟練時事任仁化縣知縣爲政寬和平恕粹然儒者風以廉能膺薦擢道出朝邑歸省祖墓以疾卒於家

雷乃元字長公由廩貢任寶雞縣訓導律身嚴整課上以實踐居家恂恂兀篤于友誼